

Inatsisartut Naalakkersuisullu pillugit Inatsisartut inatsisaata allangortinneqarneranik Inatsisartut inatsisaat (Kukkunersiuinermut Ataatsimiititaliap piginnaatitaanera aamma paasissutissanik atortussanillu piumasaqarsinnaatitaanera)

§ 1

Inatsisartut Naalakkersuisullu pillugit Inatsisartut inatsisaanni nr. 26-imi, 18. november 2010-meersumi, Inatsisartut inatsisaatigut nr. 12, 29. november 2013-imeersukkut, Inatsisartut inatsi-saatigut nr. 30, 9. december 2015-imeersukkut aamma Inatsisartut inatsisaatigut nr. 2, 29. maj 2020-meersukkut allangortinneqartumi, uku allangortinneqassapput:

1. § 18 ima oqaasertaqassaaq:

” § 18. Kukkunersiuinermut Ataatsimiititaliap Nunatta Karsiata naatsorsuutai kukkunersiuui-sullu taakkununga oqaaseqaataat ukiumut ataasiarluni misissortassavai, naatsorsuutillu pisari-aqalersitaannik Naalakkersuisunut apeqquteqarlunilu oqaaseqarfiginnittassalluni. Ataatsimiititaliap apeqqutai oqaaseqaataalu Naalakkersuisut akissutaat ilanngullugit Inatsisartunut saqqummiunneqartassapput.

Imm. 2. Ataatsimiititaliaq qaqugukkulluunniit uku pillugit misissuinernik aallartitsisinnaavoq oqaluuserinnissinnaallunuunniit:

1) aningaasat aqunneqarneranni suliffeqarfillu naatsorsuutitut ilaatinneqartut ingerlanneqarneranni aningaasanut tunngasutigut isiginiagassat naapertuuttumik isiginiarneqarsimanersut, aamma

2) iliutsit naatsorsuutit saqqummiunneqarnerinut ilaatinneqartut aningaasaliissutitut nalunaarutigineqartunut, inatsisinut najoqqutassianullu allanut kiisalu isumaqatigiissutitut isumaqatigiissutigineqarsimasunut nalinginnaasumillu suleriaatsimut naapertuuttuunersut.

Imm. 3. Ataatsimiititaliap sapinngisamik piaarnerpaamik Naalakkersuisut periarfississavaat nassuiaatit, nalunaarusiat immikkullu ilisimasalinnit naliliinerit il.il. ataatsimiititaliap imm. 2 malillugu pissarsiarisimasaasa oqaluuseriniarlugilluunniit aalajangersimasaasa oqaaseqarfiginissaannut.

Imm. 4. Ataatsimiititaliaq, ataatsimiititaliap tamanna pisariaqartippagu, Nunatta Karsiata naatsorsuutai pillugit isumaliutissiissuteqarnissaq utaqqinngikkaluarlugu ingerlatsinermik misissuineq imm. 2-mut ilaatinneqartoq pillugu Inatsisartunut ilisimatitsissuteqarsinnaavoq.

Imm. 5. Ataatsimiititaliap qinnuteqarneratigut, paasissutissat atortussallu suugaluartulluunniit imm. 1-2

tunngavigalugit ataatsimiititaliap suliassaanik ataatsimiititaliap isumaginninneranut pingaarutillit,
Naalakkersuisut nalunaarutigisassavaat tunniuttassallugillu.

*Imm. 6. Ataatsimiititaliamut ilaasortap ikinnerpaamik ataatsip tamanna piumasarippagu imm. 5 malillugu
paasissutissanik atortussanillu ataatsimiititaliaq pissarsiniassaaq."*

2. § 19, imm. 1, ima oqaasertassaaq:

" Namminersorlutik Oqartussat aktiaatilitut soqutigisaannik Naalakkersuisut qanoq isumaginninnerat
Kukkunersiuiinermut Ataatsimiititaliap taamatuttaaq nakkutigissavaa."

§ 2

Inatsisartut inatsisaat ulloq 1. januar 2022 atuutilerpoq.

Namminersorlutik Oqartussat, ulloq 19. november 2021

Múte Bourup Egede
Naalakkersuisut Siulittaasuat

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut